



## Uumbaji wa Dunia

**H**apo mwarizo Mungu aliziumba mbingu na nchi.—**Mwanzo 1:1.**

Baba na Mwana walihusika kwenye kazi kubwa na ya ajabu waliyokuwa wameiazimia—ya kuumba ulimwengu. Dunia ilitokea mkononi mwa Mwumbaji ikiwa nzuri ajabu. Kulikuwa na milima na vilima na tambarare; na hivi vyote vikichanganywa kati yao na mito na sehemu za maji. Dunia haikuwa tambarare tu iliyoenea kote, lakini ukinaifu wa mandhari uliepukwa kwa kuwepo vilima na milima, isiyo mirefu na iliyopasuka kama ilivyo leo, bali ya kawaida tu na mizuri kwa mwonekano. Miamba iliyokaa wazi na kuinuka sana haikuonekana kabisa katika milima hii, lakini ilisalia ndani chini ya uso wa dunia, ikisalia kama mifupa kwa ajili ya dunia. Maji yalikuwa yakitawanyika kwa namna iliyo ya kawaida. Vilima, milima na nyanda zilizo nzuri vilivikwa mimea na maua marefu, miti mirefu ya kifahari ya kila namna, iliyokuwa mikubwa mara nyingi na mizuri zaidi kuliko miti iliyopo sasa. Hewa ilikuwa safi na yenye afya, na nchi ilionekana kuwa kama ikulu inayovutia. Malaika walishuhudia na kushangilia kazi za Mungu za kushangaza na nzuri.

Baada ya dunia kuumbwa, na wanyama juu yake, Baba na Mwana walitimiza kusudio lao, ambalo lilikuwa limebuniwa kabla ya anguko la Shetani, kusudio la kumuumba mtu kwa mfano wao: Walikuwa wametenda pamoja katika uumbaji wa dunia na kila kitu kilichokuwa juu yake. Na sasa Mungu akamwambia Mwana Wake, “Na tumfanye mtu kwa mfano wetu.” Adamu alipotoka kwenye mkono wa Muumba wake alikuwa mwenye urefu mzuri na pia ulinganifu mzuri. Alikuwa na urefu zaidi ya mara mbili ya watu waishio duniani leo, na mwili wenye uwiano sawia. Sehemu zake za mwili zilikuwa kamilifu na nzuri...Hawa hakuwa mrefu kama alivyokuwa Adamu. Kichwa chake kilifikia juu zaidi ya mabega yake. Hawa pia, alikuwa na umbo zuri, mkamilifu katika linganifu na mrembo sana.

Wawili hawa ambao hawakuwa na dhambi hawakuvaa mavazi ya kutengenezwa. Walivishwa kwa vazi la nuru na utukufu, kama lile wanalolivaa malaika. Huku wakiishi katika hali ya kumtii Mungu, mduara huu wa nuru uliwazingira. Ingawa kila kitu alichokifanya Mungu kilikuwa katika ukamilifu wa uzuri, na hapakuonekana chochote kilichopungua duniani ambavyo Mungu aliumba ili kuwafurahisha Adamu na Hawa, licha ya hivyo, alidhihirisha upendo Wake mkuu kwao kwa kuipanda bustani mahususi kwa ajili yao. Sehemu ya muda wao ilipaswa ijazwe na shughuli yenye furaha ya kuitunza bustani, na sehemu katika kupokea ugeni wa malaika, wakisikiliza maelekezo yao, na katika tafakuri yenye furaha (The Story of Redemption, 20, 21).

Mwanadamu alitoka mkononi mwa Mungu akiwa mkamilifu katika kila sehemu ya akili na mwili; katika uzima mkamilifu, kwa hiyo alikuwa katika afya kamilifu (My Life Today, 126).